



18% Ohne Schweitz kein Preis E ainig Volgg vo Immigrante

Ob Hugenotte oder Hottedote,
Alt-Despoote lyycht am verotte,
mr nämme alli unter unsri Faane,
egal mit wellem Namme,
dien mir doch kaini Fremde verdamme.
Gänn Asyyl und Gfyy! vo Haimed,
vo dr Romandie bis an d'Limat
wird uffgnoo was is gnääm isch,
bi de Andere grinse mr hämisch.
S'Boot isch voll,
blyyb ääne am Zoll.

Hesch dräggigs Gäld?
Bsitzisch Dail vo dääre Wält?
E IQ iiber 130?
Oder bisch iiberuss flissig?
isch's lugrativ Di in unsere Raie z'zelle?
Hesch gnau `s Profil fir unseri Aarbedsstelle?
Denn kasch viilicht blyybe,
aber mir beobachte Di dryybe.
Numme politisch korrägt Asimilierti
bekemme dr Status Voll-Integriert.
Bewilligt „C“ oder e jeerligs „B“,
isch e Fungktion vo Dim Boortmenee
E saisonaals „A“, stoot fir am Arsch,
dr Uffenthalt isch kurz und harsch.
Bisch rasch wider dusse,
zrugg bi Dine russe,
„A“ heisst mr blasse Dir dr Marsch.
`S grosse „L“, also Kurzufenthalter
stoot bim Stürm, Vorname Walter,
Asyyl- oder Schutzsuechendi sinn „N“ oder „S“,
die stehen am Zoll unter ächtem Stress.
Isch nit dr alti Schwoobe-Hess,
dä ehemoolig Oober-NS,
e Art vo bruunem Alt-Asyylant,
halt in emene Südamerikanische Land.

Dr richtig Buechstaabe oder gar e Bass,
haisst: „, ab jetzt gilt Samschtigsjass.“
Reesslistumbe isch voll-grass,
mir hänn uff helvetisch Spass.
Die Abglände deerfe wyter wandere,
vo aim Noochbrsland zem Andere.
Hauptsach rasch zer „Schwitz“ uuse,
den ab jetzt dien is die gruuse.
Dr Räscht wo blyybt wird intergriert,
rasch zem „Ur-Schwitzer“ transformiert.
In's Albhorn bloosend an Rütlichwuur,
DRS loosend sticht dr Drumpf Buur.
Moorgereeti im Näbelmeer,
in jedem Käller: „Das Sturmgewehr“.
Ogi, Schwyyz und Unterwalde,
am Oobe duet dr Beni unterhalte.
„Willkumme“ saage mir Rot-Wyyse,
sinn e Volgg vo Multikutis,
multikonzär-n-danti Arbetsmuftis.
82% vollintegriert Helvetianer,
e paar Indi-, Alb- oder Luther-aner.
„Urschwitzer“ syt menschedängge,
blocheristisch ooni groosi Bedängge.
Eidgenösisch sin unsri diefe Wärd,
rütliverschwoore und politisch uffgläart,
stoot Feenstirm drotzend die Feschtig,
halt e weeneli eewiggeschtrig.

Unser Erschaffe isch legendäär,
vom Bänderbäär bis in's Militär.
Zem byspiil Uure, uner Paradeppfärd,
findsch wältwytt uff jedem Määrt.
Ob Patek, e alte Poole-Emigrant,
oder dr Hayek, däa Erfolgsgarant.
Logine, grindet vo Franzose,
I bikumm no e Ursprungs-Neuroose.
Vo Bally iber Maggi bis Brown-Boveri,
hänn d'Grinder, abgsee vom Karl Schweri,
as immigrierti Usländer golte.
Sinn in Gänf, St. Galle oder Olte
als fremdi Fötzel gloffe,
hänn aber kenne hoffe,
as die offe „Schwitz“ sich ihrer erbaarmt,
denn as Diräggtter bisch no nie verarmt.

Aber au unsri neyzyt Erfolgskanoone
kemme urspringligg us andre Natioone.
Sydneyygold im Marathon:
Platz eins fir d'Frau MacMahon.
Am Pferdbasche unschlagbaar,
Dong Hua Li, e „Schwiter“ Star.
Verdrätte an de Misswaale
duet sich Scheenheit uszaale.
D'Mahara McKey isch die Scheenschti,
nach ihrem „Pin-Up“ seensch di.
„Out“ isch `s Summersprosse-Heidi,
zwoor aigentligg kai Laidi,
aber au dr Mister Gaisepeter 2001,
dasch e Ghaimniss, e Glains,
isch nit e bäargler Alpe-Gsell,
sondern dr Latif Adel Abdel.
Dr Jeffery, e eemoolige Inder,
wird durch gschnätzledi Rinder,
an Curry broote, immer ryycher,
und dangg däane BSE-Viecher
au no in d'Zunft ze Basel glosse.
E woorlige Rinderwaan-Heldeposse.

Doch Fuessballnati isch Kreenig,
e jede Star e haimlige Keenig.
Ob Cantahuppi oder d'Türkilmayere
dr Sforza schuttet eh bi de Bayere.
„Pagg ihn“ sprach Yakin Libero.
Dr Drainer haisst Enzo Trossero.
Das Ganzi kennt in d'Hose go,
will sini Aawiisige muesch yybersetze lo.
Erfolg hän die Buebe bi de Fanatiker.
Vo Stuubehogger bis bruune Pragmatiker,
toobe im Joggelipargg aali uff de Räng,
mit rassistisch aamuedende Siegesgsäng,
schwingt me rooti Kriz, nit Schwarzi,
Slogans, äänligg däane vo Alt-Nazi.
Sieg uff em Fäld für e raini „Schweitz“,
suscht schleen mr dr Gegner halt in dr Baiz.
Nach em Match Tirgge- oder Näägerglopfe,
de fremde Fetzel d'Schnuure stopfe.
Dr aige Stiirmerstar namens Lubumba,
dasch pervärs und `s Dumme draa,
muess nach em Matsch schnell abzische,
denn as Zivile dien`s en snsch verdresche.

18% uuse, e rundi Zaal,
18% gruuse, `s isch e Quaal.
18%, I glaub i bi bsoffe,
180° umhere und `s isch gloffe
D'Abstimmig bach ab. loot is hoffe.
Die „Schweitz“ isch doch no offe,
fir neyi Lyt und anderi Gedangge,
mir zaige de Uusgränzer d'Schrangge.
Multikulti-HipHop und Nostra Festa,
statt e eewig Niggerli, e kurzi Siesta.
Mir 100% „Schweitzer“ vo schwarz bis wyss,
yber gääl, rot oder bruun mache kai Gschiss,
denn mir alli sinn yo glyych, die aine glyycher
und `s Ganzi wird ryycher, ryycher und ryycher.